



G. ARAVINN THEVARR meraikan kejayaannya selepas menamatkan acara 200m lelaki akhir SukIPT 2016 di Stadium UTM, Johor Bahru semalam dengan rekod baharu kejohanan. - UTUSAN/MOHD. HAZROL ZAINAL

Aravinn catat rekod baharu 200m

Oleh MOHAMAD FAIZAL HASHIM

sukan@utusan.com.my

JOHOR BAHRU - Jaguh pecut Help University, G. Aravinn Thevar mencipta rekod baharu kejohanan dalam laluannya memenangi pingat emas acara 200 meter Sukan Institusi Pendidikan Tinggi (SukIPT) di Stadium Universiti Teknologi Malaysia (UTM) semalam.

Pelari kebangsaan itu berjaya memperbaiki rekod peribadinya, setelah menamatkan larian dalam masa 21.11 saat sekali gus mencatat rekod baharu kejohanan acara berkenaan.

Bagi Aravinn, penyertaannya dalam kejohanan SukIPT 2016 ini membuka lembaran baharu untuknya apabila kembali beraksi dalam acara 100m dan berupaya mencatat rekod peribadi dalam acara tersebut.

"Pada SukIPT kali ini, selain menyertai 200m, saya turut mengambil bahagian dalam acara 100m dan 4x100m dan ini amat memenatkan. Bagaimanapun, ia tidak menjelaskan prestasi saya dan berjaya memperbaiki rekod peribadi dalam kejohanan pertama untuk tahun ini."

"Sebelum ini, saya hanya memberi tumpuan kepada acara 200m



sahaja. Saya berpuas hati apabila mendapat perak dalam 100m dengan catatan masa 10.57 saat dan mungkin akan terus mengambil bahagian dalam acara ini sekiranya disarankan jurulatih," katanya.

Aravinn yang akan mewakili negara dalam temasya Sukan Universiti ASEAN (AUG) di Singapura pada Julai depan bercita-cita untuk memecah rekod kebangsaan 20.92 saat yang dihasilkan Tan Sri M. Jegathesan pada 1968.

Sementara itu, acara 200m wanita dimenangi oleh Zaidatul Husniah Zulkifli dari Universiti Putra Malaysia (UPM) yang turut mencatatkan rekod baharu kejohanan dengan masa 24.34 saat.

UPM turut menambah dua lagi pingat emas pada hari terakhir sukan olahraga dalam acara 3,000m lari berhalangan lelaki menerusi Ahmad Luth Hamizan dan acara lompat kijang lelaki menerusi Muhammad Hakimi Ismail.